

Na osnovu čl. 4.7. i 4.10. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11) i člana 17. Pravilnika o licencama – Prečišćeni tekst ("Službeni glasnik BiH", broj 63/16), na sjednici Državne regulatorne komisije za električnu energiju, održanoj 17. septembra 2025. godine, donesena je

O D L U K A

O UTVRĐIVANJU REGULATORNE NAKNADE

1. Ovom Odlukom utvrđuje se visina regulatorne naknade koju plaćaju vlasnici licenci izdatih od strane Državne regulatorne komisije za električnu energiju (DERK), te način plaćanja, odnosno izmirenja obaveze plaćanja regulatorne naknade od strane vlasnika licence.
2. Regulatorna naknada na godišnjem nivou iznosi 3.190.000,00 KM (tri miliona i sto devedeset hiljada konvertibilnih maraka).
3. Obavezi plaćanja regulatorne naknade iz tačke 2. ove Odluke podliježu vlasnici licenci u iznosima i za licencirane djelatnosti, kako slijedi:

- za djelatnost prijenosa električne energije	1.990.000,00 KM
- za djelatnost nezavisnog operatora sistema	139.000,00 KM
- za djelatnost distribucije	118.000,00 KM
- za djelatnost trgovine i snabdijevanja, po licenci	41.000,00 KM
- za djelatnost međunarodne trgovine, po licenci	41.000,00 KM
4. Vlasnici licenci plaćaju regulatornu naknadu kvartalno, unaprijed, u skladu s posebnim aktom DERK-a.
5. Vlasnici licenci plaćaju iznos regulatorne naknade proporcionalno periodu važenja licence.
6. Ova Odluka stupa na snagu osmog dana od dana objavljivanja u "Službenom glasniku BiH", a objavljuje se i u službenim glasilima entiteta i Brčko Distrikta BiH.

Obrazloženje

Shodno Zakonu o prijenosu, regulatoru i operatoru sistema električne energije u Bosni i Hercegovini, osnovni prihod DERK-a čini regulatorna naknada koju plaćaju vlasnici licenci za obavljanje djelatnosti prijenosa električne energije, nezavisnog operatora sistema i međunarodnu trgovinu električnom energijom, a od 2011. godine i vlasnici licenci za obavljanje elektroenergetskih djelatnosti, čije je sjedište u Brčko Distriktu BiH.

Finansijskim planom za 2026. godinu planirana su ukupna potrebna sredstva za finansiranje troškova DERK-a u iznosu od 3.398.000,00 KM.

Višak prihoda nad rashodima na kraju tekuće godine je procijenjen na iznos od 193.000,00 KM, ostali prihodi u iznosu od 15.000,00 KM, tako da je regulatorna naknada utvrđena u iznosu 3.190.000,00 KM.

Proračun obaveza vlasnika licenci po djelatnostima uvažava osnovanu procjenu da će licence koje izdaje DERK tokom 2026. godine posjedovati "Nezavisni operator sistema u Bosni i Hercegovini", "Elektroprijenos Bosne i Hercegovine", "Komunalno Brčko" i 22 vlasnika licence za obavljanje djelatnosti međunarodne trgovine električnom energijom.

Dio regulatorne naknade okvirno je raspodijeljen između reguliranih djelatnosti prijenosa električne energije i nezavisnog operatora sistema na osnovu odnosa ukupnih troškova i rashoda Nezavisnog operatora sistema u BiH i ukupnih troškova i bruto dobiti Elektroprijenosa BiH, a uvažavajući dosadašnji trend promjene visine regulatorne naknade.

Regulatorna naknada koju će plaćati “Komunalno Brčko” za posjedovanje licence za obavljanje djelatnosti distribucije električne energije i licence za obavljanje djelatnosti trgovine i snabdijevanja električnom energijom na teritoriji BiH, određena je raspodjelom postojeće obaveze na posebne iznose koji su uporedivi sa sličnim iznosima u okruženju koje plaćaju regulirani subjekti za iste djelatnosti s uporedivom veličinom konzuma.

Iako su u toku postupci izdavanja prethodnih dozvola za izgradnju objekta za proizvodnju električne energije u Brčko Distriktu BiH, nije izvjesno da će u narednoj godini ti objekti biti završeni i izdate licence za proizvodnju električne energije, te s toga nisu ni predviđene ovom Odlukom.

Vlasnici licenci za regulirane djelatnosti imaju pravo da iznos regulatorne naknade na koju su obavezani uračunaju u svoju tarifu.

S obzirom na značaj i svrhu pojedinog tipa licence iz dijela nereguliranih djelatnosti, regulatorna naknada za djelatnost trgovine i snabdijevanja električnom energijom na teritoriji BiH je jednaka iznosu koji plaćaju vlasnici licence za međunarodnu trgovinu.

Iznos regulatorne naknade vlasnicima licenci za djelatnosti iz tačke 3. ove Odluke bit će određen proporcionalno vremenu važenja licence u toku 2026. godine.

Broj: 05-28-12-271-1/25

Predsjedavajući Komisije

17. septembra 2025. godine

Tuzla

Suad Zeljković